



Davant ina sala plaina ha preschentà la scola da Tusaun la paraula «Il misteri da las 7 perlas».

FOTOS MAD

Festival da teater popular attira blers aspectaturs

■ Il 9avel Festival da teater grischun che ha gi lieu dals 15 als 18 da matg 2014 a Tusaun è stà in success er a regard il numer da visitaders. Quests han pudì vesair stupent teater popular. Il comité d'organisaziun dal 9avel Festival da teater sut il presidi da *Lina Frei-Baselgia* fa ina bilantscha positiva da l'eveniment. Ils visitaders han pudì giudair las pli differentas furmas da teater ch'i dat en il Grischun.

La varietad sco fil cotschen

Era sche l'aura n'è betg propi stada optimala per star da cumpagnia po il comité d'organisaziun tuttina guardar enavos sin in numer da visitaders zunt allegraivel. Per propi, da gievgia suentermezdi fin dumengia saira han visità dapli che 2000 aspectaturas ed aspectaturs las respreschentaziuns. Els han profità da l'ocasiun ed han vesì fitg differentas produziuns. Ultra dals tocs classic e las comedias enconuschentas eran sin il program inscenaziuns da paraulas, improviziuns, musical, clownerias, film, musica cun persunas impedidas e parodia sco perfin sport da teater e circus. Ma betg be la scola da Tusaun, il teater Muntanelas e las uniuns da las vischnancas vischnas han attratg blers aspectaturs profund uschia da lur avantatg da chasa, ma-



Ils trais protagonistas dal toc curt «Champions League» han mussà tge ch'i pudess capitar il proxim zercladur en ina ustaria dal territori rumantsch.

bain era diversas pitschnas gruppas e quai grazia a lur tocs originals plains da surpraisas.

L'Uniun grischuna per il teater popular ed il comité d'organisaziun dal 9avel Festival da teater engrazian a las gruppas ed uniuns che s'han participadas per lur engaschament, als sponsurs per lur sostegno finanziel e material sco er a las



Il toc «Examen per peduns» è sta in sketsch dad ot nivel, giugà da maniera suverana da dus commembers da l'Uniun da teater da Sagogn.

aspectaturas ed als aspectaturs per lur interess e lur participaziun. Els speran ch'ils impuls ch'il festival ha dà portian en l'avegnir fritgs a favur dal teater popular. Quai vala surtut per il teater d'uffants e giuvenils. Tusaun ha numnadain mussà il grond potenzial che è avant maun e che pudess, gea stuess, vegnir tratg a niz.

Mario Pult